

Reforma javne uprave bitna za unaprjeđenja brojnih aspekata bh. društva

Efikasna i profesionalna **javna uprava** preduvjet je unaprjeđenja brojnih aspekata bh. društva, istaknuto je na konferenciji o izazovima **reforme javne uprave** koja se održava danas u Sarajevu. Predsjedavajući Vijeća ministara BiH Denis Zvizdić naveo je da su otvorena i transparentna **javna uprava**, efikasne i jednostavne procedure, te obučeni i profesionalni državni službenici neophodni da bi svi procesi u BiH bili efikasniji. Dodao je da bi time ukupan ekonomski, društveni i politički život dobio na kvalitativnoj dinamici i omogućio Bosni i Hercegovini da se prilagodi pravnoj stečevini EU. "S tim u vezi Vijeće ministara BiH je usvojilo nekoliko bitnih dokumenata a **reforma javne uprave** je samo jedna od reformi koje provodimo i mogu reći da je Vijeće ministara Reformsku agendu ispunilo u velikom postotku", rekao je Zvizdić. Šef Delegacije EU u BiH i specijalni predstavnik EU ambasador Lars-Gunnar Wigemark rekao je da ta reforma nije novi zadatak kad je u pitanju Bosna i Hercegovina, ali je došlo vrijeme da se ozbiljno pozabavimo njome. "Ta reforma je izazov s kojim se susreće svih šest zemalja na zapadnom Balkanu i svakako će kao tematika biti obrađena u novoj strategiji EU za zapadni Blakan koja će biti predstavljena u februaru. Funkcionalna, efikasna i nepolitička **javna uprava** je osnova za dobrobit svih građana zemalja regije a posebno je značajna u procesu evropskih integracija", naglasio je Wigemark. **Koordinator za reformu javne uprave Dragan Ćuzulan** istakao je da je glavni izazov u procesu **reforme javne uprave** predstavlja nedostatak evidencija i podataka, te pozvao bh. institucije da tokom narednog mjerenja dostave relevantne podatke kako bi Evropskoj komisiji dali jasniju sliku stanja. Konferencija je organizovana u okviru SIGMA (Support for Improvement in Governance and Management) inicijative koju primarno finansira EU.

<https://www.akta.ba/vijesti/reforma-javne-uprave-bitna-za-unaprjedenja-brojnih-aspekata-bh-drustva/86568>

KLJUČNE RIJEČI

javna uprava, ,reforma, ,Vijeće ministara, ,Denis Zvizdić, ,Lars-Gunnar Wigemark, ,Dragan Ćuzulan, ,SIGMA

AUTOR

Fena